

## ERRURI

INCONTRU CU VICENZU ANCONA, 31 MAGGIO 1964

Na vota abbonarma di mè ziu  
cu sò cugnatu e nautru cumpari  
havennu d'arricchiri un gran disiu  
si misi puru ntesta d'emigrari,  
mè zia mischina quantu cummattiu  
ma st'omu nun si potti rassignari;  
difatti a l'America sinniu  
ma nuddu chiù lu vitti riturnari.

E quantu ci ni sù: Vicenzu Ancona  
pi la famigghia putiri sfamari  
lassaru l'ossa nta nautra zona  
senza l'affettu di chiddi chiù cari,  
chi nuddu preti ci canta la Cona  
e nuddu si dinocchia pi prigari;  
a tia vulennu ti firriau bona  
tu riturnasti arre a Casteddammari.

Nun ti conosciu e ti vogghiu abbrazzari  
veni p'agghiri ccà nun fari stori,  
però Vicenzu nun mi cinsurari  
si mentri chianciu nun trovu palori  
un gran ricordu ti vulia purtari  
pinzannu chi si nasci e chi si mori;  
ma vinni finu ccà a Casteddammari  
sulu pi rigalariti stu cori.

## L'URFANEDDA VIDUVA

Basta un chianciti chiù, Donna Virginia  
e comu mi cunortu ? Donna Tania ?  
megghiu chi lu Signuri mi stirminia  
pi quantu almenu mi leva sta smania,  
pi lu Governu siguri sta linia  
aiu tri morti nta la terra strania;  
mè patri morsi nguerra a l'Abissinia  
mè frati e mè maritu a la Germania.

Ca rintra discurianu na sira  
pinzannu chi travagghiu nun ci nn'era  
pi guaragnari na misira lira  
ristaru morti dintra na miniera;  
dunni chi nuddu c'adduma na cira  
e nuddu fa pi iddi na prighiera.

## LU ME' RITRATTU

Statura rigulari, frunti chiana  
la facci tunna chi pari na luna  
l'oricchi di crapuzza Girgintana  
capiddi tisi comu li spuntuna,  
lu nasu nicu, dintatura sana  
l'occhi dù putenti lampiuna;  
dù vrazza di na forza erculana  
ma strutti pi li scossi di picuna.

Pettu pussenti, larga spaddatura  
lu panzuneddu pocu, pocu nfora,  
lu Cori moddu, la mpignazza dura  
la paruledda sempri sora, sora  
« e lenta, lenta la caminatura  
comu na donna ncinta primalora ».

## LU DISUCCUPATU

Nascivi na stu munnu scilliratu  
farimi na scialata mi criria,  
duravi un pezzu tempu spinziratu  
quannu la vita ancora un conuscia;  
criscennu m'addunai c'havia sbagliatu  
capivi chi stu munnu è purcheria;  
cu campa a stentu e mori dispiratu  
cu campa a sbafu, sciala e scarcania.

Eternu Patri, Onnipotenti luci  
di stu piccatu tù m'ha pirdunari,  
s'ogni pirsuna assignasti na cruci  
cu mia, nun ti sapisti rigulari;  
sti gran nichei, sti turturi atruci  
tù criri chi si ponnu suppurtari ?  
in forma umana, c'è armali firuci  
chi di la vita fannu dispisari.

Lu cori l'haiu duru com'un cuti  
nemmenu cu na mazza pò sgangari,  
ma quannu sentu ddì longhi chianciuti  
chi li mè figghi unn'hannu chi manciari;  
farrìa comu li ieni nsarvaggiuti  
m'innissi a Roma e ghiricci a spiari;  
pirchè mi servi sta bedda saluti ?  
quannu sirvizzu unni pozzu truvari.

O genti granni di lu Ministeru  
s'aviti un cori mpettu e dignità  
usati un trattamentu chiù sinceru  
un trattamentu senza sparità;  
pi lu putiri, mi n'importa un zeru  
mi servi sulu, la tranquillità;  
cuntuamenti cercu e mi disperu  
pani, lavoru, paci e libirtà.

## GIUGNU

Giugnu veni rirennu e ni prumetti  
di farini na bedda divirtuta  
taliannu la campagna si diverti  
d'un mantu d'oru la viri vistuta,  
niatri l'accugghiemu a vrazza aperti  
cu na fauci nmanu rugginuta;  
cu nmarda, cu al'apperi e cu carretti  
ognunu parti pi la sò tinuta.

Pari ch'è festa stratuna, stratuna  
ogni matina nta li primi arburi  
mentri lu sulu cu i sò raggi duna  
gran forza e lena ad'ogni mitituri,  
si senti di luntanu na canzuna  
cu noti beddi, paroli d'amuri;  
omini, vecchi, fimmini e garzuna  
sunnun nta na surgenti di suduri.

Ma un sentinu stanchizza nè suduri  
metinu tutti cu granni alligria  
mancu si duna cuntutu a lu caluri  
na larma ventu c'è chi frisculia,  
mentri la vuci di lu liaturi  
porta lu vinu ci dici: Lucia;  
e tutti ncoru cu tonu d'amuri  
gridamu forti ddu Viva Maria.

Sintennu dda scialoma, dda vuciata  
si metti a la campagna l'armunia  
la Marunnuzza cuntenti e priata  
rirennu ni fa puru cumpagnia,  
la sira n'accumpagna pi la strata  
ddu duci sonu di l'Avimaria  
e la stanchizza di tutta l'annata  
la fa passari giugnu e cusì sia.

## LU SCILOCCU

*U latru arrobba ognunu lu viri  
e nun c'è liggi chi lu pò puniri*

Liggivi un versu di Pippinu Fruci  
ludava tantu la spiga di granu  
dicia: chi lu sò fruttu tantu duci  
è alimentu pi l'essiri umanu;  
finu a ghiorna narrè la stessa vuci  
l'havia fattu iò chi sù viddanu;  
ma quannu vitti chiddu chi successi  
canciai lu sonu, li canti e li versi.

Doppu n'annata di stenti e faticchi  
cu spisi di cuncimi e di lavoru  
taliavamu cu preu ddi longhi spighi  
lucenti, ncuraddati comu l'oru;  
gioia pi tutti, pi granni e pi nichì  
quannu chi ncasa c'è pani e ristoru  
ma lu sciloccu fitusu e birbanti  
ni fici fari un vuccuni nvacanti.

All'unnici di giugnu fici festa  
lu sciluccazzu cu slanciu furiusu  
scippau li reschi, li ciccìa, la nmesta  
lassannu sulu un fustu fora usu;  
ogni viddanu cu li manu ntesta  
dicia: Diu meu, sugnu cunfusu;  
si nun ci penza lu nostru governu  
ch'annu a manciari i mè figghi st'nvernu ?

## COMU PASSU LI IURNATI

Accuffulatu cca darrè st'arcova  
mi chianciu dda saluti chi paliava  
quannu ch'a pugna chiantava li chiova  
e poi senza tinagghia li scippava,  
e quannu tanti voti retti prova  
cu li mè renti cuti rusicava  
e pi pritisa na pignata nova  
cu na gran tistatuna la sfunnava.

Ora nun l'hiau chiù dda forza antica  
chi cu na manu sprimia na giaca,  
sugnu comu na fella quannu spica  
ch'un'ammuttuni nterra la sdivaca;  
du pani manciu sulu la muddica  
nun vivu vinu pirchè mi mriaca  
però caminu ancora binirica  
cu la velocità di na lumaca.

## PACECU MEU

Cu nun conosci stu mè paiseddu  
un ni lu criri tantu malufinu,  
puru lu sacristanu avemu beddu  
lu Sinnacu, Mammana e lu Parrinu  
si mi firassi maniaru un pinzeddu  
un quadru ni facissi suprafinu;  
cu chiazza, la matrici, lu casteddu  
mpustannuci la villa Serrainu.

Mpudenti maistusu sempri spicca  
lu grattacelu chi ci fà di scocca;  
ddumu la miccia comu Petru Micca  
si senza mai qualcunu lu tocca  
« quantunchi mi la passu a pani picca  
ma nuddu m'allunatana di sta rocca ».

## RISPETTU PI PACECU

Paceca unn'è un paisi comu tanti  
nun c'è tiatri, un c'è divertimenti  
e quannu caminannu e pi davanti  
ni vennu certi cosi puzzulenti,  
la culpa di cu è ? di l'abitanti  
usaricci rispettu un custa nenti;  
perciò st'aiu prigrannu a tutti quanti  
tenilu chiù pulitu, chiù accuglienti.

Vi pregu a tutti pi na curtisia  
un Pacicotu è chiddu chi v'invita  
si siti Pacicoti comu mia  
dunni passamu cca tutta la vita  
usannuci rispettu e pulizia  
l'onuri di cu è ? di cu c'abbita.

PACECU IN FESTA - 26 NOVEMBRE 1964

Stiornu fici cinquantatrè anni  
e ncasa mia c'è lu spenni, spenni,  
li Pacicoti tutti, nichi e granni  
organizzaru na festa sulenni;  
centu picciotti sònanu li lanni  
d'ogni balcuni na banneru penni  
e tiligrammi poi di tutti banni  
di Preti, Saragatti, Moru e Nenni.

Picciotti st'hiau virennu cosi novi  
chi doppu mortu li ricordu ancora  
p'u sciavuru chi c'è la fami smovi  
na quararata di gira e scalora;  
cunsidirati semu diciannovi  
tra ènnari, niputi, figghi e nora;  
prigamu a Gesù Cristu chi nun chiovi  
pirchè la maggiuranza semu fora.



## LU VIDDANU

Nasciu pi maniarli li zappuna  
fauci, runca, l'anginu e l'aratu  
prima di l'alba la matina sduna  
la sira s'arrampica senza ciatu,  
s'ammazza, s'affatica, s'appurmuna  
pi dari pani a stu munnazzu ngratu;  
si meritassi d'oru na curuna  
eppuru unn'è di nuddu calculatu.

Comu si susi pi ncampagna addizza  
un pezzu i pani na gran cipuddazza  
porta a tuttu lu munnu la ricchezza  
nun taliannu culuri, sessu, razza,  
ma quannu chi l'avvinci la vicchezza  
e chiù nun ci accumpagnanu li vrazza;  
è calculatu quantu la munnizza  
nto nfunnu di na vecchia cartiddazza.

## DIFFIRENZA DI SPINI

Na donna essennu di ciuri agguriusa  
dintru un gnardinu na rosa cugghiu,  
dissi, ch'è bedda, ch'è meravigghiusa  
la megghiu ciuri criata di Diu,  
ma quannu s'addunò ch'era spinusa  
d'avilla ntra li manu si pintiu;  
c'un gestu di na serpa vilinusa  
e cu disprezzu nterra la sbattiu.

La rosa di stu gestu la riprenni  
ci dissi: tu un m'havissi a disprizzari?  
li spini l'haiu si però s'intenni  
chi cu li toi nun ponnu appattari;  
di li mè spini ognunu si difenni  
ma di li spini to, un si pò guardari.